

四庫全書薈要

• 乾隆御覽本

集部

欽定四庫全書薈要

集部
詞綜卷一

臣金士松詳校

詳校官編修臣繆晉



詞綜總目

卷一

唐詞六十八首

卷二

五代十國詞七十二首

卷三

五代十國詞七十六首

卷四

宋詞六十七首

卷五

宋詞七十首

卷六

宋詞六十四首

卷七

宋詞六十二首

卷八

宋詞六十首

卷九

宋詞五十六首

卷十

宋詞六十一首

卷十一

宋詞六十四首

卷十二

宋詞六十三首

卷十三

宋詞六十八首

卷十四

宋詞六十八首

卷十五

宋詞六十六首

卷十六

宋詞六十一首

卷十七

宋詞六十首

卷十八

宋詞六十二首

卷十九

宋詞六十六首

目錄
卷二十

宋詞七十六首

卷二十一

宋詞七十首

卷二十二

宋詞四十五首

卷二十三

宋詞四十三首

卷二十四

宋詞七十首

卷二十五

宋詞五十首

卷二十六

金詞六十二首

卷二十七

元詞五十三首

卷二十八

元詞五十四首

卷二十九

元詞五十二首

卷三十

元詞五十八首

臣等謹案詞綜三十卷

國朝秀水朱彝尊編其同時增定者則桐鄉汪

森也所採唐宋金元詞通五百餘家于專集
諸選本之外凡稗官野紀中有片詞足錄者
輒為採掇故多他選未見之作其調名句讀
為他選所淆舛及姓氏爵里之悞皆詳攷而
訂正之其去取亦具有鑒別蓋彙尊本工于
填詞平日嘗以姜夔為詞家正宗而張輯盧
祖臯史達祖吳文英蔣捷王沂孫張炎周密
為之羽翼謂自此以後得其門者或寡又謂

小令當法汴京以前慢詞則取諸南渡又謂
論詞必出於雅正故曾慥錄雅詞鮑陽居士
輯復雅又盛稱絕妙好詞甄錄之當其立說
精確故其所選能簡擇不苟如此以視花間
草堂諸編勝之遠矣乾隆四十二年十二月
恭校上

總纂官臣紀昀臣陸錫熊臣孫士毅

總校官臣陸費墀

詞綜發凡

唐宋以來作者長短句每別為一編不入集中以是散佚最易常熟吳氏訥彙有宋元百家詞抄傳絕少未見全書近日毛氏晉刻有汲古閣六十家宋詞頗有裨于學者是編所錄半屬抄本白門則借之周上舍雪客黃徵士俞邵京師則借之宋員外牧仲成進士容若吳下則借之徐太史健菴里門則借之曹侍郎秋岳餘則汪子晉賢購諸吳興藏書家互為參定其

已經選輯者南唐二主詞集一卷馮延巳陽春錄一卷潘閬逍遙詞一卷林逋和靖先生集詞晏殊珠玉詞一卷歐陽修六一居士詞三卷王安石半山老人詞一卷晏幾道小山詞二卷張先子野詞一卷柳永樂章集九卷蘇軾東坡居士詞二卷黃庭堅琴趣外篇二卷秦觀淮海詞三卷晁補之詞一卷陳師道後山長短句二卷李之儀姑溪集詞二卷賀鑄東山寓聲樂府三卷毛滂東堂詞二卷杜安世詞一卷黃裳

演山集詞二卷葛勝仲丹陽詞一卷周紫芝竹坡居士樂府三卷謝逸溪堂詞一卷謝邁竹友詞一卷葛郊信齋詞一卷廖行之省齋詩餘周邦彥清真集三卷晁端禮閑齋琴趣外篇一卷徐仲青山樂府一卷呂渭老詞一卷徐積節孝集附詞陳瓘了齋詞一卷王安中初寮集詞一卷向子諲酒邊集四卷蔡伸友古詞一卷王庭珪盧溪詞二卷葉夢得石林詞一卷王之道相山居士詞二卷向鎬樂齋詞二卷沈瀛竹

齊詞一卷劉弇雲龍集詞一卷汪藻浮溪文粹附詞

趙師俠坦菴長短句一卷陳與義無住詞一卷劉一

止菖溪詞一卷趙長卿惜香樂府十卷王灼頤堂詞

一卷張綱華陽老人長短句岳飛金陀粹編家集附

詞張元幹蘆川詞一卷鄧肅旂幟集詞一卷劉子翬

屏山集附詞張掄蓮社詞一卷朱敦儒樵歌三卷曾

覲海野詞一卷楊無咎逃禪詞三卷侯寘嬾窟詞一

卷曾惇詞一卷朱雍梅詞一卷辛棄疾稼軒樂府十

二卷范成大石湖詞一卷黃公度知稼翁詞一卷葛
立方歸愚詞一卷張孝祥于湖詞一卷程垓書舟雅
詞二卷韓元吉焦尾集詞一卷周必大近體樂府一
卷倪偁綺川詞一卷姚述堯簫臺公餘詞一卷京鏜
松坡居士樂府一卷朱熹晦庵詞一卷洪适盤洲集
詞二卷吳儼竹洲詞一卷楊萬里誠齋樂府一卷李
處全晦庵詞一卷丘密文定公詞一卷羅願鄂州小
集附詞劉克莊後村別調一卷趙彥端介庵詞四卷

管鑑養拙堂詞一卷張鑑玉照堂詞一卷劉擬招山

集樂章程泌銘水集詞一卷王千秋審齋詞一卷姜

夔白石詞一卷陸游渭南集詞二卷陳亮龍川集詞

二卷劉過龍洲詞一卷楊炎西樵語業一卷張輯東

澤綺語債一卷謝懋靜寄居士樂章二卷黃機竹齋

詩餘一卷劉鎮隨如百詠吳禮之順受老人詞五卷

許棐梅屋詩餘一卷戴復古石屏詞一卷毛幵樵隱

詞一卷洪咨夔平齋詞一卷郭應祥笑笑詞一卷盧

祖皋蒲江詞一卷高觀國竹屋癡語一卷史達祖梅
溪詞二卷汪莘方壺存稿詞二卷吳潛履齋詩餘三
卷李昉英文溪詞一卷趙以夫虛齋樂府二卷陳經
國龜峯詞一卷方岳秋厓先生小稿詞四卷張榘芸
窓詞一卷洪璚空同詞一卷方千里和清真詞一卷
楊澤民續和清真詞一卷盧炳哄堂詞一卷沈端節
克齋詞一卷黃昇散花庵詞一卷嚴羽滄浪集附詞
王以寧詞一卷吳文英夢窓甲乙丙丁稿四卷蔣捷

竹山詞一卷陳允平日湖漁唱二卷周密草窗詞二

卷王沂孫碧山樂府二卷張炎玉田詞二卷石孝友

金谷遺音一卷林正大風雅遺音四卷張矩梅淵詞

陳德武白雪遺音一卷文天祥文山集詞一卷王鼎

翁遺集附詞何夢桂潛齋詞一卷惠洪石門文字禪

附詞葛長庚海璫詞二卷李清照漱玉集一卷朱淑

真斷腸集一卷韓玉東浦詞一卷段克已遜齋樂府

一卷段成已菊軒樂府一卷元好問遺山樂府二卷

許衡魯齋集附詞程鉅夫雪樓集詞一卷王惲秋澗
集詞四卷趙孟頫松雪詞一卷劉因樵庵詞一卷汪
宗臣紫岩集附詞吳澄草廬詞一卷虞集道園學古
錄詞一卷宋聚燕石集詞一卷劉詵桂隱集附詞曹
伯啟漢泉漫稿詞一卷許有壬圭塘小藁詞一卷薩
都拉雁門集詞一卷張翥蛻岩詞二卷袁易靜春詞
一卷沈禧竹窓詞一卷洪希文續軒渠集詞一卷張
可久小山樂府二卷喬吉惺惺老人樂府一卷張堃

古山樂府一卷倪瓚清閨閣詞一卷顧瑛玉山璞附
詞陶宗儀南村集附詞邵亨貞蛾術詞選四卷凌雲
翰柘溪集詞一卷王行半軒集詞一卷張雨貞居詞
一卷凡百六十餘家雖已覽觀未入選者楊杰無為
集徐經孫文惠集徐鹿卿清正集魏了翁鶴山詞王
義山稼軒類稿又順齋樂府虛靖真君詞洞玄珠玉
集凡八家

藏書家編目錄詞集多不見收惟莆田陳氏書錄解題

論其大畧鄱陽馬氏采入通考志中所載晁冲之具
茨集王觀冠柳集趙令時聊復集蘇庠後湖集万俟
雅言大聲集陳克赤城詞康與之順菴樂府趙鼎得
全居士集劉光祖鶴林詞左譽筠菴長短句姚寬西
溪居士樂府蘇洵冷然閣集嚴仁清江欵乃詞孫惟
信花翁詞魏子敬詞王武子詞李洪兄弟花萼集吳
激東山集蔡松年蕭閒公集舊本散失未經寓目或
詩集雖在而詞則闕如僅於選本中錄其一二至于

汪元量水雲詞蔡桷浩歌集黃人傑可軒曲林黃定
鳳城詞曹冠燕喜集馬寧祖退圃詞吳鑑敬齋詞袁
去華詞侯延慶退齋詞黃談澗壑詞林淳定齋詩餘
鄧元漫堂集王大受近情集張孝忠野適堂詞劉德
秀默軒詞鍾將之岫雲詞徐得之西園鼓吹李叔猷
東老詞方信儒好菴遊戲陳從古洮湖詞廖子耕蕭
閒詞隻字未見此外軼者尚多海內收藏之家或有
存本倘許借觀願仿曾氏雅詞之例別為拾遺附于

卷末

世人言詞必稱北宋然詞至南宋始極其工至宋季而始極其變姜堯章氏最為傑出惜乎白石樂府五卷今僅存二十餘闕也東澤綺語傳亦寥寥至施秉之孫季蕃盛以詞鳴沈伯時樂府指迷亦為矜譽今求其集不可復覩周公謹陳君衡王聖與集雖抄傳公謹賦西湖十景當日屬和者甚衆而今集無之花草粹編載有君衡二詞陸輔之詞旨載有聖與霜天曉

角等調中語均今集所無至張叔夏詞集晉賢所購
合之牧仲員外雪客上舍所抄暨常熟吳氏百家詞
本校對無異以為完書頃吳門錢進士官聲相遇都
亭謂家有藏本乃陶南村手書多至三百闕則予所
見猶未及半漏萬之譏殆不免矣

古詞選本若家宴集謫仙集蘭畹集復雅歌辭類分樂
章羣公詩餘後編五十大曲萬曲類編及草廔周氏
選皆軼不傳獨草堂詩餘所收最下最傳三百年來

學者守為兔園冊無惑乎詞之不振也是集兼采趙
宏基花間集黃昇花庵絕妙詞中興以來絕妙詞陳
景沂全芳備祖樂府元好問中州樂府彭致中鳴鶴
餘音鳳林書院元詞樂府補題許有孚圭塘欸乃集
顧梧芳樽前集楊慎詞林萬選陳耀文花草粹編沈
際飛草堂詩餘廣集茅映詞的卓人月詞統諸書務
去陳言歸于正始至如曾慥樂府雅詞天機餘錦采
入花草粹編趙粹夫陽春白雪集見李開先小山樂

府後序則諸書嘉隆間猶未散軼而天機碎錦片玉
珠璣二集聞江都藏書家有之又如百一選曲太平
樂府詩酒餘音仙音妙選樂府新聲樂府羣珠樂府
羣玉曲海之內定有詞章可采惜俱未之見也

向客太原見晉祠石刻多北宋人唱和詞而平遙縣治
西古寺廡下有金人所作小令勒石嵌壁令工人搨
回經十餘年簡之故麓則已為鼠啣盡是集成未克
採入深以為恨計海內名山苔龕石壁宋元人留題

長短句尚多好事君子惠我片楮無異雙金也

詞有當時盛傳久而翻逸者遺珠片玉往往見于稗官
載紀是編自百川學海古今小說唐宋叢書曾氏類
說吳氏能改齋漫錄阮氏詩話總龜胡氏荅溪漁隱
叢話陶氏說郛商氏裨海陸氏說海陳氏秘笈外繙
閼小說又不下數十家片詞足采輒事筆疏故多他
選未見之作庶幾一開生面佐予討論編纂者汪子
而外則安丘曹舍人升六無錫嚴徵士孫友江都汪

舍人季角宜興陳徵士其年華亭錢舍人葆勸吳江
俞處士無殊休寧汪上舍周士季青錢塘龔主事天
石同郡俞處士右吉沈上舍融谷繆處士天自沈布
衣覃九葉舍人元禮李徵士武曾布衣分虎沈秀才
山子柯孝廉翰周浦布衣傳功暨門人周瀟岳也鏤
版未竟而錢葉二君相繼奄逝可為泣然

詞人姓氏爵里選家書法不一先系爵後書名者花間
集中州樂府體也書字於官爵下者絕妙詞選體也

書名者全芳備祖體也書字者草堂體也冠別字於
姓夕之前者鳳林書院體也至楊氏詞林萬選陳氏
花草粹編或書名或書字或書別字或書官或書集
覽者茫然莫究其世次甚有別本以朱三十五樵歌
為秋娘作者良可大噓是集考之正史參以地志傳
紀小說以集歸人以字歸名得十之八九論世之功
柯子寓匏有焉

周布衣青士隱於廛市於書無所不闕辨證古今字句

音韻之譌輒極精當是集藉其校讐如史梅溪綺羅
香後閨還被春潮晚急原係六字為句草堂坊本脫
去晚字諸本因之周晴川十六字令眠月影穿牕白
玉錢原係眠字為句選本譌作明字遂以明月影為
句歐陽永叔越溪春結語沉麝不燒金鴨玲瓏月照
梨花並係六字句坊本譌玲為冷瓏為籠遂以七字
五字為句德祐太學生祝英臺近那人何處怎知道
愁來不去譌不為又一字之乖全旨皆失今悉為改

正他如蘓子瞻念奴嬌則從容齋隨筆汪彥章點絳唇則從能改齋漫錄王晉卿燭影搖紅則從漫錄去其前闕李后主臨江仙則從耆舊續聞補其結語其餘糾定難更僕數坊間雖有圖譜倚聲者宜攷質焉四聲二十八調各有其倫柳屯田樂章集有同一曲名字數長短不齊分入各調者姜石帚湘月詞注云此念奴嬌之鬲指聲也則曲同字數同而湘月念奴嬌調實不同合之爲一非矣詞固有一曲而各異其名

者是選悉依集本不敢更易審音者度無勿知似不必比而同之也

張子野弔林君復詩烟雨詞亡草更青蔡君謨寄李良定詩多麗新詞到海邊一篇之工見之吟咏山抹微雲秦學士露華倒影柳屯田曉風殘月柳三變滴粉搓酥左與言一句之工形諸口號當日風尚所存甄藻自爾不爽故是集多綴宋元人評語有明用脩元美諸家品隲容有未當或置不錄焉

宣政而後士大夫爭爲獻壽之詞聯篇累牘殊無意味
至魏華父則非此不作矣是集于千百之中止存一
二雖華父亦置不錄也

元人小曲如乾荷葉天淨沙凭欄人平湖樂

一名小等桃紅

調平上去三聲並用往往編入詞集然按之宋詞如

戚氏西江月換巢鸞鳳少年心惜分釵漁家傲

杜安世集

體諸閨已爲曲韻濫觴矣是集間有采錄蓋倣楊氏
詞林萬選之例覽者幸勿以詞曲混一爲訕

言情之作易流於穢此宋人選詞多以雅爲目法秀道人語涪翁曰作艷詞當墮犁舌地獄正指涪翁一等體製而言耳填詞最雅無過石帚草堂詩餘不登其隻字見胡浩立春吉席之作蜜殊咏桂之章亟收卷中可謂無目者也甚而易靜兵要寓聲于望江南張用成悟真篇按調爲西江月詞至此亦不幸極矣是集於黃九之作去取特嚴不敢曲徇後山之說

宋人編集歌詞長者曰慢短者曰令初無中調長調之

目自顧從敬編草堂詞以臆見分之後遂相沿殊屬
牽率歲在癸丑舍館京師宣武門右與葆飭舍人戶
庭相望予輯是書葆飭輯詞喫辨晰體製以字數多
寡爲先後最爲精密計一千詞編爲三十卷比年間
更增益予所見鳴鶴餘音洞玄金玉集及他抄本曲
調異同詞喫未經采入者約又百餘惜未遑郵寄今
葆飭逝矣遺書在笥雕刻無期誠倚聲家之闕事也
花間體製調即是題如女冠子則詠女道士河瀆神則

金史四庫全書
爲送迎神曲虞美人則詠虞姬是也宋人詞集大約
無題自花庵草堂增入閨情閨思四時景等題深爲
可憎今俱準集本刪去

明初作手若楊孟載高季迪劉伯溫輩皆溫雅芊麗咀
宮含商李昌祺王達善瞿宗吉之流亦能接武至錢
唐馬浩瀾以詞名東南陳言穢語俗氣薰入骨髓殆
不可醫周白川夏公謹諸老間有硬語楊用修王元
美則強作解事均與樂章未諧然三百年中豈無合

作當遍搜文集發其幽光編為二集繼是編之後
古今詞話一書博訪未得詞人瑣事散見各家詩話及
傳記小說中捃拾需時是集未能附綴將仿孟榮本
事詩計敏夫唐詩紀事別為一集以資談柄近吳江
徐徵士電發著詞苑叢譚一書可云先獲我心當讓
其單行矣

詞綜卷一

翰林院檢討朱彝尊編

唐詞六十八首

昭宗皇帝二首

李 白 五首

張志和 二首

韋應物 一首

戴叔倫 一首

王 建 二首

韓 翃 一首

白居易 五首

劉禹錫 二首

溫庭筠 三十首

皇甫松
五首

鄭符
一首

段成式
一首

司空圖
一首

韓偓
一首

張曙
一首

呂嵒
一首

柳氏
一首

王麗真
一首

無名氏
一首

昭宗皇帝

巫山一段雲
題賓雞驛壁

蝶舞梨園雪鶯啼柳帶烟小池殘日艷陽天
芡蘿山又

山青鳥不來愁絕忍看鴛鴦雙結春風一等少年心
閒情恨不禁

菩薩蠻

登華州城樓

登樓遙望秦宮殿
茫茫只見雙飛燕
渭水一條流
千山與萬丘
遠烟籠碧樹
陌上行人去
安得有英雄
迎歸大內中

唐詩紀事作何處是英雄迎僂歸故宮按尉遲偓中朝故事云乾寧三年李茂貞犯闕帝次華

州韓建迎歸郡中帝鬱鬱不樂每登城西齊雲樓遠望明年秋製此詞云

李白

字太白蜀人一云山東人供奉翰林

菩薩蠻

平林漠漠烟如織，寒山一帶傷心碧。暝色入高樓，有人

樓上愁。

玉階

一作闌干

空佇立，宿鳥歸飛急。何處是歸程，

長亭更

一作連

短亭

湘山野錄云此詞不知何人寫在鼎

州滄水驛樓復不知何人所撰魏道

輔奏見而愛之後至長沙得古風集於曾子宣內翰家乃知李白所撰

憶秦娥

簫聲咽，秦娥夢斷秦樓月。秦樓月，年年柳色，灞陵傷別。
樂游原上清秋節，咸陽古道音塵絕。音塵絕，西風殘

照漢家陵闕

清平樂令

禁闌秋夜月探金窓罅玉帳鴛鴦噴蘭麝時落銀燈香
地女伴莫話孤眠六宮羅綺三十一笑皆生百媚宸
遊教在誰邊

桂殿秋

仙女下董雙成漢殿夜涼吹玉笙曲終却從仙官去萬
戶千門惟月明

又

河漢女玉鍊顏雲駟往往在人間九霄有路去無跡

梟香風生珮環

吳虎臣云此太白詞也有得于石刻而無其腔劉無言倚其聲歌之音極清雅

張志和

字子同金華人擢明經肅宗命待詔翰林坐貶不復仕自稱烟波釣徒

漁歌子

西塞山前白鷺飛桃花流水鱖魚肥青箬笠綠蓑衣斜

風細雨不須歸

黃魯直云有遠韻

又

松江蟹舍主人歡
菰飯蓴羹亦共餐
楓葉落秋花乾
醉宿漁舟不覺寒

韋應物

京兆人官左司郎中
歷蘄州刺史

調笑

河漢河漢曉挂秋城漫漫
愁人起望相思塞北江南
別離離別離別河漢雖同路絕

戴叔倫

字幼公金壇人官撫州刺史
封譙縣男遷容管經畧使

轉應詞

邊草邊草邊草盡來兵老山南山北雪晴千里萬里月
明明月明月胡笳一聲愁絕

王

建

字仲初潁州人大曆十年
進士太和中為陝州司馬

調笑

團扇團扇美人並來遮面玉顏憔悴三年誰復商量管
絃絃管絃管春草昭陽路斷

又

蝴蝶蝴蝶飛上金枝玉葉君前對舞春風百葉桃花樹

紅紅樹紅樹燕語鶯啼日暮

韓

翊

字君平南陽人天寶十三載進士以駕部郎中知制誥終中書舍人

章臺柳

寄柳氏

章臺柳章臺柳往日依依

一作青青

今在否縱使長條似舊

垂也應攀折他人手

白居易

字樂天其先太原人徙下邦貞元十四年進士歷官中書舍人出知杭州以刑部尚書致

仕卒贈僕射諡

文有長慶集

花非花

花非花霧非霧夜半來天明去來如春夢不多時去似
朝雲無覓處

憶江南

江南好風景舊曾諳日出江花紅勝火春來江水綠如
藍能不憶江南

又

江南憶最憶是杭州山寺月中尋桂子郡亭枕上看潮
頭何日更重遊

又

江南憶其次憶吳宮吳酒一杯春竹葉吳娃雙舞醉芙蓉
早晚得相逢

長相思

深畫眉淺畫眉蟬鬢鬢雲滿衣陽臺行雨迴
巫山
高巫山低暮雨瀟瀟郎不歸空房獨守時

劉禹錫

字夢得中山人貞元中進士仕為太子賓客會昌中檢校禮部尚書

春去也

春去也多謝洛城人弱柳從風疑舉袂叢蘭裛露似沾巾獨坐亦含嚬

瀟湘神

斑竹枝斑竹枝淚痕點點寄相思楚客欲聽瑤瑟怨瀟湘深夜月明時

溫庭筠

本名岐字飛卿太原人官方山尉有握蘭金荃等集

黃叔暘云飛卿詞極流麗宜為花間集之冠

菩薩蠻

小山重疊金明滅。鬢雲欲度香顚雪。嬾起畫蛾眉。弄妝梳洗遲。
照花前後鏡。花面交相映。新帖繡羅襦。雙雙金鷓鴣。

又

水精簾裏頗黎枕。暖香惹夢鴛鴦錦。江上柳如烟。鴈飛殘月天。
藕絲秋色淺。人勝參差剪。雙鬢隔香紅。玉釵頭上風。

又

玉樓明月長相憶
柳絲裊娜春無力
門外草萋萋送君
聞馬嘶
畫羅金翡翠
香燭銷成淚
花落子規啼
綠窓殘夢迷

又

牡丹花謝鶯聲歇
綠楊滿院中庭月
相憶夢難成
背窓燈半明
翠鈿金壓臉
寂寞香閨掩
人遠淚闌干
燕飛春又殘

又

滿宮明月梨花白故人萬里關山隔金鴈一雙飛淚痕
沾繡衣小園芳草綠家住越溪曲楊柳色依依燕歸
君不歸

又

寶函鈿雀金鸂鶒沉香閣上吳山碧楊柳又如絲驛橋
春雨時畫樓音信斷芳草江南岸鸞鏡與花枝此情
誰得知

又

竹風輕動庭除冷珠簾月上玲瓏影山枕隱濃妝綠檀
金鳳凰兩蛾愁黛淺故國吳宮遠春恨正闌情畫樓
殘點聲

更漏子

柳絲長春雨細花外漏聲迢遞驚塞鴈起城烏畫屏金
鷓鴣香霧薄透簾幕惆悵謝家池閣紅燭背繡簾垂
夢長君不知

又

星斗稀鐘鼓歇簾外曉鶯殘月蘭露重柳風斜滿庭堆
落花虛閣上倚闌望還似去年惆悵春欲暮思無窮
舊歡如夢中

又

玉爐香紅蠟淚偏照畫堂秋思眉翠薄鬢雲殘夜長衾
枕寒梧桐樹三更雨不道離情正苦一葉葉一聲聲

空階滴到明

胡元任云庭筠工於造
語極為奇麗此詞尤佳

歸國遙

香玉翠鳳寶釵垂翠殺鈿筐交勝金粟越羅春水綠
畫堂照簾殘燭夢餘更漏促謝娘無限心曲曉屏山斷
續

又

雙臉小鳳戰篴金飀豔舞衣無力風斂藕絲秋色染
錦帳繡幃斜掩露珠清曉簟粉心黃藥花壓黛眉山兩
點

酒泉子

楚女不歸樓枕小河春水月孤明風又起杏花稀玉
釵斜簪雲鬟重裙上鏤金雙鳳八行書千里夢鴈南飛
南歌子

手裏金鸚鵡胸前繡鳳凰偷眼暗形相不如從嫁與作
鴛鴦

又

似帶如絲柳團酥握雪花簾卷玉鈎斜九衢塵欲暮逐
香車

又

倭墮低梳髻連娟細掃眉終日兩相思為君憔悴盡百
花時

又

轉盼如波眼娉婷似柳腰花裏暗相招憶君腸欲斷恨
春宵

又

懶拂鴛鴦枕休縫翡翠裙羅帳罷燼薰近來心更切為

思君

河清神

河上望叢祠
廟前春雨來時
楚山無限鳥飛遲
蘭棹空傷別離
何處杜鵑啼不歇
豔紅開盡如血
蟬鬢美人愁絕
百花芳草佳節

又

孤廟對寒潮
西陵風雨蕭蕭
謝娘惆悵倚蘭橈
淚流玉筍千條
暮天愁聽思歸樂
早梅香滿山郭
回首兩情

蕭索離魂何處飄泊

女冠子

含嬌含笑宿翠殘紅窈窕鬢如蟬寒玉簪秋水輕紗卷
碧烟雪胸鸞鏡裏琪樹鳳樓前寄語青娥伴早求仙
玉蝴蝶

秋風淒切傷離行客未歸時塞外草先衰江南鴈到遲
芙蓉凋嫩臉楊柳墮新眉搖落使人悲斷腸誰得知
清平樂

洛陽愁絕楊柳花飄雪終日行人爭攀折橋下水流鳴咽
上馬爭勸離觴南浦鶯聲斷腸愁殺平原年少回首揮淚千行

遊方怨

憑繡檻解羅幃未得君書腸斷瀟湘春鴈飛不知征馬
幾時歸海棠花謝也雨霏霏

訴衷情

鶯語花舞春晝午雨霏微金帶枕宮錦鳳凰帷柳弱燕

交飛依依遼陽音信稀夢中歸

思帝鄉

花花滿枝紅似霞羅袖畫簾腸斷卓香車迴面共人間
語戰篋金鳳斜惟有阮郎春盡不歸家

夢江南

梳洗罷獨倚望江樓過盡千帆皆不是斜暉脉脉水悠
悠腸斷白蘋洲

河傳

江畔相喚曉妝鮮
仙景箇女采蓮
請君莫向那岸邊
少年好花新滿船
紅袖搖曳逐風軟
垂玉腕腸向柳絲
斷浦南歸浦北歸
莫知晚來人已稀

又

湖上閒望雨蕭蕭
烟浦花橋路遙
謝娘翠蛾愁不銷
終朝夢魂迷晚潮
蕩子天涯歸棹遠
春已晚鶯語空腸
斷若耶溪溪水西
柳堤不聞郎馬嘶

蕃女怨

萬枝香雪開已遍
細雨雙燕鈿蟬
箏金雀扇畫梁相見
鴈門消息不歸來
又飛迴

又

磧南沙上驚鴈起
飛雪千里玉連環
金鏐前年年征戰
畫樓離恨錦屏空
杏花紅

荷葉杯

鏡水夜來秋月如雪
采蓮時小娘紅粉
對寒浪惆悵正

思惟

一作相思

又

楚女欲歸南浦朝雨濕愁紅小船搖漾入花裏波起隔西風

皇甫松

字子奇
湜之子

天仙子

晴野鷺鷥飛一隻水藻花發秋江碧劉郎此日別天仙
登綺席淚珠滴十二晚峯青

一作高

歷歷

又

躑躅花開紅照水
鷓鴣飛遶青山
背行人經歲始歸來
千萬里錯相倚
懊惱天仙應有以

摘得新

酌一卮須教玉笛吹
錦筵紅蠟燭莫來遲
繁紅一夜經風雨
是空枝

夢江南

蘭燼落屏上
暗紅焦閒夢江南
梅熟日夜船吹笛
雨瀟瀟
人語驛邊橋

又

樓上寢殘月下簾旌夢見秣陵惆悵事桃花柳絮滿江
城雙髻坐吹笙

鄭符

字夢復官
秘書監

閒中好

題永
壽寺

閒中好盡日松為侶此趣人不知輕風度僧語

段成式

字柯古文昌子會
昌中官太常少卿

閒中好

閒中好塵務不縈心坐對當窓木看移三面陰

司空圖

字表聖泗州人咸通中進士官禮部員外郎黃巢之亂避地中條山昭宗反正以戶部侍郎召至京復歸再以兵部侍郎召不赴有一鳴集

酒泉子

買得杏花十載歸來方始坼假山西畔藥欄東滿枝紅
旋開旋落旋成空白髮多情人更惜黃昏把酒祝東
風且從容

韓偓

字致堯一作光萬年人龍紀中進士累官兵部侍郎朱全忠惡之貶濮州司馬有香奩集

生查子

侍女動妝奩故故驚人睡
那知本未眠背面偷垂淚
嬾卸鳳凰釵羞入鴛鴦被
時復見殘燈和烟墜金穗

張

曙小字阿仄
侍郎韓子

浣溪沙

枕障薰爐隔繡帷二年終日兩相思
杏花明月始應知
天上人間何處去舊歡新夢覺來時
黃昏微雨畫簾垂

呂

嵩

字洞濱閩右人咸通中舉進士不第携家隱終南

梧桐影

景德寺僧房

落日斜秋風冷今夜故人來不來教人立盡梧桐影

別按

本首句皆作落月斜非是今從竹坡詩話更正又景德寺城眉院壁所題今夜故人作出人今夜

柳氏

韓翎寵姬

楊柳枝

答韓員外

楊柳枝芳菲節可恨年年贈離別一葉隨風忽報秋縱

使君來豈堪折

王麗真女郎

見才鬼錄

字字雙

牀頭錦衾斑復斑
架上朱衣殷復殷
空庭明月閒復閒
夜長路遠山復山

無名氏

後庭宴

千里故鄉十年華
屋亂魂飛過屏山
簇眼重眉褪不勝
春菱花知我銷香玉
雙雙燕子歸來應
解笑人幽獨

斷歌零舞遺恨清江曲萬樹綠低迷一庭紅撲蔌



詞綜卷一



總校官庶吉士臣張能照
校對官中書臣楊世綸
謄錄監生臣張德燾

欽定四庫全書薈要

集部
詞綜卷二
三



詞綜卷二

翰林院檢討朱彝尊編

五代十國詞七十二首

後唐莊宗 二首

蜀主王衍 一首

蜀主孟昶 一首

南唐中宗李景 二首

南唐後主李煜 十首

和凝 四首

韋莊 二十首

薛昭蘊 四首

牛嶠 七首

毛文錫 八首



牛希濟 二首

歐陽炯 十一首

後唐莊宗皇帝

一葉落

一葉落寒朱箔此時景物正蕭索畫樓月影寒西風吹
羅幕吹羅幕往事思量著

憶仙姿

曾宴桃源深洞一曲舞鸞

一作清歌

歌鳳長記別伊時和淚

出門相送如夢如夢殘月落花烟重

蜀主王衍

醉妝詞

者邊走那邊走只是尋花柳那邊走者邊走莫厭金杯

酒

北夢瑣言云蜀主衍嘗裹小巾其尖如錐宮女多衣道服簪蓮花冠施燕脂夾臉號醉妝作此詞

蜀主孟昶

玉樓春

夜起避暑摩訶池上作

冰肌玉骨清無汗水殿風來暗香滿繡簾一點月窺人
歌枕釵橫雲鬢亂起來瓊戶啟無聲時見疎星渡河

漢屈指西風幾時來只恐流年暗中換

按蘇子瞻洞仙歌本集括此詞

然未免反有點金之憾

南唐中宗李景

山花子

菡萏香銷翠葉殘西風愁起綠波間
還與韶光共憔悴不堪看
細雨夢回難塞遠小樓吹徹玉笙寒
多少淚珠何限恨倚闌干

又

手卷眞珠上玉鈎，依前春恨鎖重樓。
風裏落花誰是主，思悠悠。
青鳥不傳雲外信，丁香空結雨中愁。
回首淒波三峽暮，接天流。

後主李煜

相見歡

林花謝了春紅太匆匆，無奈朝來寒雨晚來風。
胭脂淚，相留醉，幾時重。自是人生長恨水長東。

又

無言獨上西樓月如鉤寂寞梧桐深院鎖清秋 剪不

斷理還亂是離愁別是一般滋味在心頭

黃叔暘云此詞最悽惋所

謂亡國之音哀以思

清平樂

別來春半觸目愁腸斷砌下落梅如雪亂拂了一身還滿
鴈來音信無憑路遙歸夢難成離恨恰如春草更
行更遠還生

浪淘沙

簾外雨潺潺春意闌珊羅衾不暖五更寒夢裏不知身
是客一晌貪歡獨自暮凭欄無限江山別時容易見
時難流水落花歸去也天上人間

蔡條云含
思悽惋

又

往事只堪哀對景難排秋風庭院鮮侵階一桁珠簾閒
不卷終日誰來金釧已沉埋壯氣蒿萊晚涼天靜月
華開想得玉樓瑤殿影空照秦淮

玉樓春

晚妝初了明肌雪春殿嬪娥魚貫列鳳簫聲斷水雲閒
重按霓裳歌遍徹臨風誰更飄香屑醉拍闌干情未
切歸時休放燭花紅待踏馬蹄清夜月

子夜

花明月暗籠

一作飛

輕霧今宵好向郎邊去

一作袂

步

香階

一作苔

手提金縷鞋

畫堂南畔見一晌偎人顫好

一作奴

為出

一作去

來難教君恣意憐

又

人生愁恨何能免，消魂獨我情何限。
故國夢重歸，覺來雙淚垂。
高樓誰與上，長記秋晴望。
往事已成空，還如一夢中。

虞美人

風迴小院庭蕪綠，柳眼春相續。
凭欄半日獨無言，依舊竹聲新月似當年。
笙歌未散樽罍在，池面冰初解。
燭明香暗畫樓深，滿鬢清霜殘雪思難禁。

又

春花秋月何時了往事知多少小樓昨夜又東風故國
不堪回首月明中雕欄玉砌應猶在只是朱顏改問
君能有幾多愁恰似一江春水向東流

臨江仙

櫻桃落盡春歸去蜨翻輕粉雙飛子規啼月小樓西玉
鈎羅幕惆悵暮烟垂別巷寂寥人散後望殘烟草低
迷爐香閒裊鳳凰兒空持羅帶回首恨依依

蘇子由云
淒涼怨慕

真亡國之聲也

按是詞相傳後主在圍城中賦未就
而城破闕後三句劉延仲補之云何時重聽玉驄嘶撲

簾柳絮依約夢回時而舊舊
續聞所載故是全作當從之

和

凝

字成績鄆州人舉進士仕後唐知制誥翰林
學士晉天福中拜中書侍郎同中書門下平

章事歸後漢拜太子太
傅封魯國公有紅葉稿

春光好

蘋葉軟杏花明畫船輕雙浴鴛鴦出綠汀棹歌聲
春
水無風無浪春天半雨半晴紅粉相隨南浦晚幾含情
采桑子

蠟燭領上訶梨子繡帶雙垂椒戶閒時競學擣蒲賭荔

枝叢頭鞋子紅編細裙窄金絲無事頰眉春思翻教
阿母疑

河滿子

寫得魚牋無限其如花鎖春輝目斷巫山雲雨空教殘
夢依依却愛薰香小鴨羨他長在屏幃

漁父

白芷汀寒立鷺鷥蘋風輕剪浪花時烟幕幕日遲遲香
引芙蓉卷釣絲

韋

莊

字端已杜陵人乾寧元年進士入蜀王建辟掌書記尋召為起居舍人建表留之後為蜀

散騎常侍判中書門下事有浣花集

菩薩蠻

紅樓別夜堪惆悵香燈半捲流蘇帳殘月出門時美人
和淚辭琵琶金翠羽絃上黃鶯語勸我早歸家綠窓
人似花

又

人人盡說江南好遊人只合江南老春水碧於天畫船

聽雨眠
壚邊人似月
皓腕凝霜雪
未老莫還鄉
還鄉
須斷腸

又

如今却憶江南樂
當時年少春衫薄
騎馬倚斜橋
滿樓
紅袖招
翠屏金屈曲
醉入花叢宿
此度見花枝
白頭
誓不歸

又

洛陽城裏春光好
洛陽才子他鄉老
柳暗魏王堤
此時

心轉迷 桃花春水淥水上鴛鴦浴凝恨對斜暉憶君
君不知

歸國遙

金翡翠為我南飛傳我意卷畫橋邊春水幾年花下醉
別後只知相愧淚珠難遠寄羅幙繡幃鴛被舊歡如
夢裏

應天長

綠槐陰裏黃鸝語深院無人春晝午畫簾垂金鳳舞寂

寶繡屏香一炷 碧天雲無定處空有夢魂來去夜夜
綠窻風雨斷腸君信否

又

別來半歲音書絕一寸離腸千萬結難相見易相別又
是玉樓花似雪 暗相思無處說惆悵夜來烟月想得
此時情切淚沾紅袖黦

荷葉杯

絕代佳人難得傾國花下見無期一雙愁黛遠山眉不

忍更思惟 閒掩翠屏金鳳殘夢羅幕畫堂空碧天無

路信難通惆悵舊房櫳

古今詞話云韋莊以才名寓蜀王建割據遂霸留之莊有寵人

姿質艷麗無善詞翰建聞之托以教內人為詞強莊奪去莊追念悵快作小重山及此詞情意悵怨人相傳播盛行於時姬後傳聞之遂不食而卒

又

記得那年花下深夜初識謝娘時水堂西面畫簾垂携手暗相期 惆悵曉鶯殘月相別從此隔音塵如今俱是異鄉人相見更無因

清平樂

野花芳草寂寞關山道柳吐金絲鶯語早惆悵香閨暗
老羅帶悔結同心獨凭朱欄思深夢覺半牀斜月小
窻風觸鳴琴

又

鶯啼殘月繡閣香燈滅門外馬嘶郎欲別正是落花時
節妝成不畫蛾眉含愁獨倚金扉去路香塵莫掃掃
即郎去歸遲

河傳

何處烟雨隋堤春暮柳色蔥蘢畫橈金縷翠旗高颺香
風水光融青蛾殿脚春妝媚輕雲裏綽約司花妓江
都宮闕清淮月映迷樓古今愁

又

春晚風暖錦城花滿狂殺游人玉鞭金勒尋勝馳驟輕
塵惜良辰翠蛾爭勸臨卣酒纖纖手拂面垂絲柳歸
時烟裏鐘鼓正是黃昏暗銷魂

又

錦浦春女繡衣金縷霧薄雲輕花深柳暗時節正是清
明雨初晴 玉鞭魂斷烟霞路鶯鶯語一望巫山雨香
塵隱映遙望翠檻紅樓黛眉愁

訴衷情

燭燼香殘簾半卷夢初驚花欲謝深夜月籠明何處按
歌聲輕輕舞衣塵暗生負春情

又

碧沼紅芳烟雨淨倚蘭橈垂玉珮交帶裊纖腰鴛夢隔
星橋迢迢越羅香暗銷墜花翹

上行盃

芳草灞陵春岸柳烟深滿樓絃管一曲離聲腸寸斷
今日送君千萬紅鏤玉盤金鏤盞須勸珍重意莫辭滿
女冠子

四月十七正是去年今日別君時忍淚佯低面含羞半
斂眉不知魂已斷空有夢相隨除却天邊月没人知

更漏子

鐘鼓寒樓閣。暝月照古桐。金井深院閉小庭。空落花香。
露紅。烟柳重春霧。薄燈背水窗。高閣閒倚戶。暗沾衣。
侍郎郎不歸

薛昭蘊

仕至侍郎

浣溪沙

粉上依稀有淚痕。郡庭花落欲黃昏。遠情深恨與誰論。
記得去年寒食日。延秋門外卓金輪。日斜人散暗銷魂。

魂

相見歡

羅襦繡袂香紅畫堂中細草平沙蕃馬小屏風
卷羅幕凭妝閣思無窮暮雨輕烟魂斷隔簾櫳

女冠子

求仙去也翠鈿金篦盡捨入巖巒霧卷黃羅帔雲彫白
玉冠野烟溪洞冷林月石橋寒靜夜松風下禮天壇
謁金門

春滿院疊損羅衣金線睡覺水精簾未卷簾前雙語燕
斜掩金鋪一扇滿地落花千片早是相思腸欲斷忍
教頻夢見

牛

嶠

字松卿一字延峰隴西人乾符五年進士歷官拾遺補尚書郎王建鎮蜀辟判官後仕蜀

為給事中

女冠子

錦江烟水卓女燒春濃美小檀霞繡帶芙蓉帳金釵芍
藥花
額黃侵膩髮臂釧透紅紗柳暗鶯啼處認郎家

感恩多

兩條紅粉淚多少香閨意強攀桃李枝斂愁眉
陌上鶯啼蝶舞柳花飛柳花飛願得郎心憶家還早歸

望江怨

東風急惜別花時手頻執羅幃愁復入馬嘶殘雨春
蕪濕倚馬立寄語薄情郎粉香和淚泣

菩薩蠻

舞裙香暖金泥鳳畫梁語燕驚殘夢門外柳花飛玉郎

猶未歸 愁勻紅粉淚眉剪春山翠何處是遼陽錦屏
春晝長

又

綠雲鬢上飛金雀愁眉斂翠春烟薄香閣掩芙蓉畫屏
山幾重 窻寒天欲曙猶結同心苣啼粉浣羅衣問郎
何日歸

西溪子

捍撥雙盤金鳳蟬鬢玉釵搖動畫堂前人不語絃解語

彈到昭君怨處翠蛾愁不擡頭

江城子

鷓鴣飛起郡城東
碧江空半灘風越王宮殿蘋葉藕花
中
簾捲水樓魚浪起
千片雪雨濛濛

毛文錫

字平珪唐進士仕蜀為翰林學士遷
內樞密使歷文思殿大學士司徒

虞美人

鴛鴦對浴銀塘暖
水面蒲梢短垂楊抵拂麴塵波
蛛絲結網露珠多
滴圓荷
遙思桃葉吳江碧
便是天涯隔

錦鱗紅鬣影沉沉相思空有夢相尋意難任

又

寶檀金縷鴛鴦枕綬帶盤宮錦夕陽低映小窻明南園
綠樹語鶯鶯夢難成玉爐香暖頻添炷滿地飄輕絮
珠簾不捲度沉烟庭前閒立畫鞦韆艷陽天

更漏子

春夜闌春恨切花外子規啼月人不見夢難憑紅紗一
點燈偏怨別是芳節庭下丁香千結宵霧散曉霞輝

梁間雙燕飛

紗窗恨

新春燕子還來至一雙飛壘巢泥濕時時墜
浣人衣

後園裏看百花發香風拂繡戶金扉
月照紗窗恨依依

又

雙雙蛺蝶塗鉛粉
啣花心綺窗繡戶飛來穩
畫堂陰

二三月愛隨飄絮伴
落花來拂衣襟更剪輕羅片
傳黃

金

醉花間

休相問怕相問相問還添恨春水滿塘生鷓鴣還相趁
昨夜雨霏霏臨明寒一陣偏憶戍樓人久絕邊庭信
又

深相憶莫相憶相憶情難極銀漢是紅牆一帶遙相隔
金盤珠露滴兩岸榆花白風搖玉珮清今夕為何夕
巫山一段雲

雨霽巫山上雲輕映碧天遠風吹散又相連十二晚峯

前暗濕啼猿樹高籠過客船朝朝暮暮楚江邊幾度

降神仙

牛希濟

嶠兄子仕蜀為御
史中丞降於後唐

生查子

春山烟欲收天澹稀星少殘月臉邊明別淚臨清曉

語已一本無多情未了回首猶重道記得綠羅裙處處

憐芳草

又

新月曲如眉未有團圓意紅豆不堪看滿眼相思淚
終日劈桃穠人在心兒裏兩朵隔牆花早晚成連理

歐陽炯

事後蜀為中書舍人宣和
盡譜貴休傳云大學士

三字令

春欲盡日遲遲牡丹時羅幌卷翠簾垂彩箋書紅粉淚
兩心知人不在燕空歸負佳期香燼落枕函歌月分
明花淡薄惹相思

南鄉子

嫩草如烟石榴花發海南天日暮江亭春影綠鴛鴦浴
水遠山長看不足

又

畫舸停桡槿花籬外竹橫橋水上遊人沙上女迴顧笑
指芭蕉林裏住

又

岸遠沙平日斜歸路晚霞明孔雀自憐金翠尾臨水認
得行人驚不起

又

洞口誰家木蘭船
繫木蘭花紅袖女郎相引去
南浦笑倚春風相對語

又

路入南中枕柳葉
暗蓼花紅兩岸人家微雨後
收紅豆樹底纖纖擡素手

又

袖歛鮫綃采香深
洞笑相邀藤杖枝頭蘆酒滴
鋪葵席

豆蔻花間趁晚日

賀聖朝

憶昔花間初識面紅袖半遮妝臉輕轉石榴裙帶故將
纖纖玉指偷撚雙鳳金線碧梧桐鎖深深院誰料得
兩情何日教繾綣羨春來雙燕飛到玉樓朝暮相見

江城子

曉日金陵岸草平落霞明水無情六代繁華暗逐逝波
聲空有姑蘓臺上月如西子鏡照江城

鳳樓春

鳳髻綠雲叢深掩房櫳錦書通夢中相見覺來慵勻面
淚臉珠融因想玉郎何處去對淑景誰同小樓中春
思無窮倚闌凝望闌牽愁緒柳花飛趁東風斜日照簾
櫳羅幌香冷粉屏空海棠零落鶯語殘紅

清平樂

春來街砌春雨如絲細春徑滿飄紅杏蒂春燕舞隨風
勢春幡細縷春繒春閨一點春燈自是春心撩亂非

關春夢無憑

詞綜卷二

詞綜卷三

翰林院檢討朱彝尊編

五代十國詞七十六首

顧夐 九首

鹿虔扈 一首

閻選 二首

魏承班 二首

尹鶚 二首

毛熙震 五首

李珣 十五首

孫光憲 十三首

張泌 五首

馮延巳 二十首

成幼丈一首

耿玉真一首

顧 夔

仕蜀為
太尉

河傳

燕颺晴景小
窻屏暖鴛鴦交頸
菱花掩却翠鬟欹
慵整
海棠簾外影
繡幃香斷金鸂鶒
無消息
心事空相憶
倚東風春正濃
愁紅淚痕衣上重

又

棹舉舟去波光渺渺
不知何處
岸花汀草共依依
雨微

鷓鴣相逐飛 天涯離恨江聲咽啼猿切此意向誰說
倚蘭橈獨無憀魂銷小壚香欲焦

醉公子

漠漠秋雲澹紅藕香侵檻枕倚小山屏金鋪向晚扃
睡起橫波慢獨望情何限哀柳數聲蟬魂銷似去年
又

岸柳垂金線雨晴鶯百啭家住綠楊邊往來多少年
馬嘶芳草遠高樓簾半捲歛袖翠蛾攢相逢爾許難

玉樓春

月照玉樓春漏促。颯颯風搖庭砌竹。夢驚鴛鴦被覺來時。
何處管絃聲斷續。惆悵少年游冶去。枕上兩蛾攢細。
綠曉鶯簾外語。花枝背帳猶殘紅蠟燭。

訴衷情

香滅簾垂春漏永。整鴛衾。羅帶重。雙鳳縷黃金。窗外月
光臨。沉沉斷腸無處尋。負春心。

又

永夜拋人何處去，絕來音，香閣掩眉歛。月將沉，爭忍不相尋。怨孤衾，換我心，為你心，始知相憶深。

臨江仙

碧染長空池似鏡，倚樓閒望凝情滿。衣紅藕，細香清象牀珍簾。山障掩，玉琴橫。暗想昔年歡笑事，如今贏得愁生。博山爐暖澹烟輕。蟬吟人靜，殘日傍小窗明。

楊柳枝

秋夜香閨思寂寥，漏迢迢。鴛幃羅幌麝烟銷。燭光搖。

正憶玉郎遊蕩去無尋處更聞簾外雨瀟瀟滴芭蕉

鹿虔扈

事蜀為永泰軍節度使加太保

臨江仙

金鎖重門荒苑靜綺窓愁對秋空翠華一去寂無蹤玉
樓歌吹聲斷已隨風烟月不知人事改夜闌還照深
宮藕花相向野塘中暗傷亡國清露泣香紅

閻

選後蜀處士
事後主

浣溪沙

寂寞流蘇冷繡茵倚屏山枕惹香塵小庭花露泣濃春
劉阮信非仙洞客嫦娥終是月中人此生無路訪東
鄰

河傳

秋雨秋雨無晝無夜滴滴霏霏暗燈涼簟怨分離妖姬
不勝悲西風稍急喧窻竹停又續膩臉懸雙玉幾回
邀約鴈來時違期鴈歸人不歸

魏承班

仕至
太尉

玉樓春

寂寂畫堂梁上燕，高卷翠簾橫數扇。一庭春色惱人來，
滿地落花紅幾片。愁倚錦屏低雪面，淚滴繡羅金縷。
線好天涼月盡，傷心為是玉郎長不見。

生查子

烟雨晚晴天，零落花無語。難話此時心，梁燕雙來去。
琴韻對薰風，有恨和情撫。腸斷斷絃頻，淚滴黃金縷。

尹

鶚官參卿

臨江仙

深秋寒夜銀河靜
月明深院中庭西
窓幽夢等閒成
逡巡覺後特地恨難平
紅燭半條殘
焰短依稀暗背銀屏
枕前何事最傷情
梧桐葉上點點露珠零

菩薩蠻

隴雲暗合秋天白
俯窻獨坐窺烟陌
樓際角重吹黃昏
方醉歸
荒唐難共語
明日還應去上馬出門時
金鞭莫與伊

毛熙震

蜀人官
秘書監

臨江仙

幽閨欲曙聞鶯囀紅窻月影微明好風頻謝落花聲隔
幃殘燭猶照綺屏第 繡被錦茵眠玉暖炷香斜裊烟
輕淡蛾羞斂不勝情暗思閒夢何處逐雲行

清平樂

春光欲暮寂寞閒庭戶粉蝶雙雙穿檻舞簾卷晚天疎
雨含愁獨倚閨幃玉爐烟斷香微正是銷魂時節東

風滿樹花飛

南歌子

遠山愁黛碧橫波慢臉明膩香紅玉茜羅輕深院晚堂
人靜理銀箏鬢動行雲影裙遮點屐聲嬌羞愛問曲
中名楊柳杏花時節幾多情

後庭花

越羅小袖新香蒨薄籠金釧倚闌無語搖輕扇半遮勻
面春殘日暖鶯嬌嬾滿庭花片一作綻爭不教人長相

見畫堂深院

河滿子

寂寞芳菲暗度歲華如箭堪驚緬想舊歡多少事轉添
春思難平曲檻絲垂金柳小窗絃斷銀箏深院空聞
燕語滿園閒落花輕一片相思休不得忍教長日愁生
誰見夕陽孤夢覺來無限傷情

李

珣梓州人蜀秀才有瓊瑤集黃休復茅
亭客話其先波斯人有詩名預賓貢

巫山一段雲

古廟依青嶂行宮枕碧流水聲山色鎖妝樓往事思悠
悠雲雨朝還暮烟花春復秋啼猿何必近孤舟行客
自多愁黃叔暘云唐詞多緣題所賦臨江仙則言仙事
女冠子則述道情河瀆神則咏祠廟大槩不失
本題之意爾後漸變失題遠矣如
珣此作實唐人本來詞體如此

南鄉子

烟漠漠雨淒淒岸花零落鷓鴣啼遠客扁舟臨野渡思
鄉處潮退水平春色暮

又

蘭橈舉水紋開競携藤籠采蓮來迴塘深處遙相見邀
同宴淥酒一卮紅上面

又

歸路近扣舷歌采真珠處水風多曲岸小橋山月過烟
深鎖豈寇花垂千萬朵

又

乘綵舫過蓮塘棹歌驚起睡鴛鴦帶香游女偎人笑一作

游女帶香
偎人笑

爭窈窕競折團荷遮晚照

又

傾綠蟻泛紅螺閒邀女伴簇笙歌避暑信船輕浪裏閒
游戲夾岸荔支紅蘸水

又

漁市散渡船稀越南雲樹望中微行客待潮天欲暮迷
春浦愁聽猩猩啼瘴雨

又

相見處晚晴天刺桐花下越臺前暗裏迴眸深屬意道

雙翠騎象背人先過水

又

携籠去采菱歸碧波風起雨霏霏
趁岸小船齊棹急羅衣濕出向
枕榔樹下立

又

登畫舸泛清波采蓮時唱采蓮歌
攔棹聲齊羅袖斂池光颭驚起
沙鷗八九點

又

雙髻墜小眉灣笑隨女伴下春山玉纖遙指花深處爭
迴顧孔雀雙雙迎日舞

菩薩蠻

迴塘風起波紋細刺桐花裏門斜閉殘日照平蕪雙雙
飛鷓鴣 征帆何處客相見還相隔不語欲魂銷望中
烟水遙

又

隔簾微雨雙飛燕砌花零落紅深淺捻得寶箏調心隨

征棹遙 楚天雲外路動便經年去香斷畫屏深舊歡
何處尋

西溪子

金縷翠鈿浮動妝罷小窻圓夢日高時春已老人未到
滿地落花慵掃無語倚屏風泣殘紅

尊前集作離思
正難緘燕喃喃

河傳

去去何處迢迢已楚山水相連朝雲暮雨依舊十二峯
前猿聲到客船 愁腸豈異丁香結因離別故國音書

絕想佳人花下對明月春風恨應同

孫光憲

字孟文陵州人游荆南高從晦署為從事仕南平累官檢校秘書兼御史大夫勸高繼冲

獻三州之地宋太祖授以黃州刺史將用為學士未及而卒有荆臺筆傭橘齋鞏湖諸集

河瀆神

汾水碧依依黃雲落葉初飛翠娥一去不言歸廟門空
掩斜暉四壁陰森排古畫依舊瓊輪羽駕小殿沉沉
清夜銀燈飄落香燭

又

江上草芊芊春晚湘妃廟前一方卵色楚南天數行斜
鴈聯翩獨倚朱闌情不極魂斷終朝相憶兩槩不知
消息遠汀時起鷓鴣

後庭花

石城依舊空江國故宮春色七尺青絲芳草碧絕世難
得玉英落盡何人識野棠如織只是教人添怨憶悵
望無極

清平樂

愁腸欲斷正是青春半連理分枝驚失伴又是一場離
散掩鏡無語眉低思隨芳草萋萋憑仗東風吹夢與
郎終日東西

女冠子

淡花瘦玉依約神仙妝束佩瓊文瑞路通宵貯幽香盡
日焚碧紗籠絳節黃藕冠濃雲勾以吹簫伴不同羣
風流子

樓倚長堤欲暮瞥見神仙伴侶微傳粉攏梳頭隱映畫

簾開處無語無緒慢曳羅裙歸去

又

金絡玉銜嘶馬繫向綠楊陰下朱戶掩繡簾垂曲院水流花謝歡罷歸也猶在九衢深夜

思帝鄉

如何遣情情更多永日水晶簾下斂羞蛾六幅羅裙窄地微行曳碧波看盡滿池疎雨打團荷

上行盃

離棹逡巡欲動臨極浦故人相送去住心情知不共
金船滿捧綺羅愁絲管咽迴別帆影滅江浪如雪

浣溪沙

蓼岸風多橘柚香江邊一望楚天長片帆烟際閃孤光
目送征鴻飛杳杳思隨流水去茫茫蘭紅波碧憶瀟

湘

謁金門

留不得留得也應無益白紵春衫如雪色揚州初去日

輕別離甘拋擲江上滿帆風疾却羨綵鴛三十六孤
鸞還一隻

思越人

古臺芳草遠館娃宮外春深翠黛空留千載恨教人
何處相尋 綺羅無復當時事露花點滴香淚惆悵遙
天橫淥水鴛鴦對對飛起

又

渚蓮枯宮樹老長洲廢苑蕭條想像玉人空
一作處所

月明獨上溪橋 經春初敗秋風起紅蘭綠蕙愁死一
片風流傷心地魂銷目斷西子

張

泌 字子澄江南心仕
南唐為內史人

酒泉子

紫陌青門三十六宮春色御溝輦路暗相通杏園風
咸陽沽酒寶釵空笑指未央歸去插花走馬落殘紅月
明中

南歌子

柳色遮樓暗
桐花落砌香
畫堂開處遠
風涼高卷水精簾
額襯斜陽

江城子

碧闌干外小中庭
雨初晴
曉鶯聲飛絮落花時
節近清明
睡起卷簾無一事
勻面了
沒心情

又

浣花溪上見卿卿
臉波明
黛眉輕高綰綠雲金簇小蜻蜒
好是問他來得麼
和笑道
莫多情

浣溪沙

鈿轂香車過柳堤
樺烟分處馬頻嘶
為他沉醉不成泥
花滿驛亭香露細
杜鵑聲斷玉蟾低
含情無語倚樓西

馮延巳

字正中其先彭城人唐末徙家新安仕南唐為左僕射同平章事有陽春錄一卷

陳世脩序云馮公全外舍祖樂府思深詞麗韻逸調新

羅敷艷歌

馬嘶人語春風岸
芳草綿綿楊柳橋
邊落日高樓酒旆

懸舊愁新恨知多少目斷遙天獨立花前更聽笙歌
滿畫船

又

小堂深靜無人到滿院春風惆悵牆東一樹櫻桃帶雨
紅愁心似醉兼如病欲語還慵日暮疎鐘雙燕歸來
畫閣中

清平樂

雨晴烟晚綠水新池滿雙燕飛來垂柳院小閣畫簾高

捲黃昏獨倚朱欄西南初月眉灣砌下落花風起羅衣特地春寒

又

春愁南陌故國音書隔細雨霏霏梨花白燕拂畫簾金
額盡日相望王孫塵滿羅衣淚痕誰向橋邊吹笛駐
馬西望銷魂

芳草渡

梧桐落蓼花秋烟初冷雨纔收蕭條風物正堪愁人去

後多少恨在心頭 燕鴻遠羗笛怨渺渺澄波一片山
如黛月如鉤笙歌散魂夢斷倚高樓

歸國謠

江水碧江上何人吹玉笛扁舟遠送瀟湘客 蘆花千
里霜月白傷行色明朝便是關山隔

蝶戀花

六曲闌干偎碧樹楊柳風輕展盡黃金縷誰把細箏移
玉柱穿簾燕子雙飛去 滿眼游絲兼落絮紅杏開時

一霎清明雨濃睡覺來鶯亂語驚殘好夢無尋處

又

誰道閒情拋棄久每到春來惆悵還依舊日日花前常
病酒不辭鏡裏朱顏瘦 河畔青蕪堤上柳為問新愁
何事年年有獨立小橋風滿袖平林新月人歸後

又

幾日行雲何處去忘却歸來不道春將暮百草千花寒
食路香車繫在誰家樹 淚眼倚樓頻獨語雙燕來時

陌上相逢否掩亂春愁如柳絮依依夢裏無尋處

又

庭院深深深幾許楊柳堆烟簾幙無重數玉勒雕鞍遊
冶處樓高不見章臺路雨橫風狂三月暮門掩黃昏
無計留春住淚眼問花花不語亂紅飛過秋千去

南鄉子

細雨濕秋風金鳳花殘滿地紅閒感黛眉慵不語情緒
寂寞相思知幾許玉枕擁孤衾抱恨還同歲月深簾

卷曲房誰共醉
憔悴惆悵秦樓彈粉淚

喜遷鶯

宿鶯啼鄉夢斷
春樹曉朦朧
殘燈和燼閉朱櫳
人語隔屏風
香已寒燈已絕
忽憶去年離別
石城花雨倚江樓
波上木蘭舟

虞美人

玉鈎鸞柱調鸚鵡
宛轉留春語
雲屏冷落畫堂空
薄晚春寒無奈落花風
寒簾燕子低飛去
拂鏡塵鸞舞不

知今夜月眉彎誰佩同心雙結倚闌干

拋毬樂

梅落新春入後庭眼前風物可無情曲池波晚冰還合
芳草迎船綠未成且上高樓望相共憑欄看月生

又

霜積秋山萬樹紅倚巖樓上挂朱櫳白雲天遠重重恨
黃葉烟深浙浙風髣髴梁州曲吹在誰家玉笛中

菩薩蠻

歌鬟墮髻搖雙漿采蓮晚出清江上
顧影約流萍楚歌嬌未成
相逢顰翠黛笑把珠璫解
家住柳陰中畫橋東復東

三臺令

春色春色依舊青山紫
陌日斜柳暗花驚醉
卧春風少年少年少
行樂直須及早

又

南浦南浦翠鬟離人何處
當時攜手高樓依舊樓前水

流流水流水中有傷心雙淚

浣溪沙

馬上凝情憶舊遊
照花淹竹小溪流
鈿箏羅幕玉搔頭
早是出門長帶月
可堪分袂又經秋
晚風斜日不勝愁

應天長

一鈎初月臨妝鏡
蟬鬢鳳釵慵不整
重簾靜
層樓迥
惆悵落花風不定
綠烟低柳逕
何處轆轤金井
昨夜更

闌酒醒春愁過却病

成幼文

江南人仕南唐官大理卿

謁金門

風乍起吹皺一池春水閒引鴛鴦香徑裏手按紅杏藥

闌鳴闌干遍倚碧玉搔頭斜墜終日望君君不至舉

頭聞鵲喜

陳質齋云世言風乍起為馮延巳作或云成幼文也今陽春集無有當是幼文作

耿玉真女郎

南唐書云盧絳病瘵且死夜夢白衣婦人歌此詞勸酒歌數闋因謂絳曰子之


疾食蔗即愈如言果差迨數夕又夢前婦人曰妾乃玉真也他日富貴相見於固子坡後

入金陵累官柱國唐亡歸宋以龔慎儀事生
誅臨刑有白衣婦人同斬姿貌宛如所夢問
其姓名曰耿玉真問受
刑之地即固子坡也

菩薩蠻

王京人去秋蕭索畫簷鵲起梧桐落欹枕悄無言月和
清夢圓背燈惟暗泣何處砧聲急眉黛遠山攢芭蕉
生暮寒

詞綜卷三



總校官庶吉士臣張能照
校對官中書臣楊世綸
謄錄監生臣張德燾